

六祖法寶記與壇經契嵩本

法海集記，契嵩編集

林崇安教授編校

佛法教材系列 W7

財團法人內觀教育基金會

〈六祖法寶記與壇經契嵩本〉序

1056 年，宋朝契嵩大師獲得《六祖法寶記》，他的朋友郎簡撰寫〈六祖法寶記敘〉說：「《法寶記》蓋六祖之所說其法也（678 頃）… 惠其為俗所增損… 會沙門契嵩作《壇經贊》，因謂嵩師曰：若能正之，吾為出財模印以廣其傳。更二載，嵩果得「曹溪古本」校之，勒成三卷，粲然皆六祖之言。」這三卷本稱作〈契嵩長本〉，它的前半部（參請機緣以前）就是契嵩校正的《六祖法寶記》；它的後半部是契嵩將參請機緣增至十六人，加上唐朝徵詔以及臨終付囑等所成。〈契嵩長本〉下傳後，沒有被改動的是〈德異本〉（1290），現存的再傳本有〈正統德異本〉（1439）、〈曹溪原本〉（1652）等，它們的前半部其實就是《六祖法寶記》的契嵩校正本，其中不少段落相同於〈惠昕本〉，比〈敦煌本〉多出的段落以◎標示，作參考用。

1060 年頃，契嵩將〈契嵩長本〉的前半部，從「學術」的角度修正了幾處，編出《六祖大師法寶壇經》的短本一卷，可說是六祖法寶記的學術修正本，此本稱作〈契嵩短本〉，下傳後現存於《明版洪武南藏》、《明版永樂北藏》、《房山石經》中。

本書編校上述二本，一是《六祖法寶記》的校正本，採用〈正統德異本〉的前半部。一是《六祖法寶記》的學術修正本，採用《明版洪武南藏》的〈契嵩短本〉，其中的學術修正列於書末一文。

本書編校時，為了比對不同版本的段落移動情形，標上新編「品名」以及「德異本編號」，作參考用。

如果只是閱讀，則可不管「品名」和「德異本編號」，因為全書是順著經文下排。文中刮號{}：表示於此內補充漏字或改正。

願此工作，有助於學佛者在義理和實踐上的增進。

林崇安 2021.03

於內觀教育禪林

六祖法寶記與壇經契嵩本

目錄

〈六祖法寶記敘〉	p. 4
〈六祖法寶記〉	p. 5
第一眾請說法品	p. 5
第二悟法傳衣品	p. 5
第三摩訶般若品	p. 11
第四功德淨土品	p. 16
第五定慧一體品	p. 18
第六教授坐禪品	p. 20
第七傳戒歸依品	p. 21
〈契嵩短本〉六祖大師法寶壇經	p. 26
第一眾請說法品	p. 26
第二悟法傳衣品	p. 26
第三摩訶般若品	p. 32
第四功德淨土品	p. 37
第五定慧一體品	p. 39
第六教授坐禪品	p. 41
第七傳戒歸依品	p. 42
契嵩短本的學術修正	p. 47

六祖法寶記敘

宋朝郎簡撰

按《唐書》曰：後魏之末有僧號達磨者，本天竺國王之子，以護國出家，入南海得禪宗妙法，自釋迦文佛相傳，有衣鉢為記，以世相付受。達磨齋衣鉢，航海而來，至梁詣武帝。帝問以有為之事，達磨不說，乃之魏隱於嵩山少林寺，以其法傳慧可，可傳僧粲，粲傳道信，信傳弘忍，忍傳慧能，而復出神秀。能於達磨在中國為六世，故天下謂之六祖，《法寶記》蓋六祖之所說其法也。其法乃生靈之大本，人焉、鬼神焉、萬物焉，遂與其清明廣大者，紛然而大異，六祖憫此乃諭人，欲人自求之，即其心而返道也。

然天下之言性命者多矣，若其言之之至詳，理之之至當，推之之至悉，而釋氏得之矣。若其示之之至直，趨之之至徑，證之之至親，而六祖之於釋氏，又其得之也。六祖於釋氏教道，可謂要乎至哉！今天子開善閣記，謂以本性證乎了義者，未有舍六祖之道而有能至於此者也。是則六祖者乃三界之慈父，諸佛之善嗣歟。偉乎！惟至聖而能知至道也。

然六祖之說余素敬之，患其為俗所增損，而文字鄙俚繁雜，殆不可考，會沙門契嵩作《壇經贊》（1054），因謂嵩師曰：「若能正之，吾為出財，模印以廣其傳。」

更二載，嵩果得曹溪古本校之，勒成三卷，粲然皆六祖之言，不復謬妄，乃命工鏤板以集其勝事。

至和三年（1056）三月十九日序
（見《鐔津文集》卷十一）

六祖法寶記

〈契嵩長本前半部〉

出處：六祖大師法寶壇經〈正統德異本〉的前半部

【第一眾請說法品】

【A1】（德異本編號）

時大師至寶林。

韶州韋刺史[名璩]，與官僚入山，請師於大梵寺講堂，為眾開緣說摩訶般若波羅蜜法。

師升座次，刺史官僚三十餘人、儒宗學士三十餘人、僧尼道俗一千餘人，同時作禮，願聞法要。

【第二悟法傳衣品】

【B1】（德異本編號）

大師告曰：善知識！總淨心念摩訶般若波羅蜜。

【B2】

大師良久，復告眾曰：善知識！菩提自性，本來清淨，但用此心，直了成佛。

【B3】

善知識！且聽惠能行由，得法事意。

能嚴父，本貫范陽，左降流於嶺南，作新州百姓。

此身不幸，父又早亡。老母孤遺，移來南海。艱辛貧乏，於市賣柴。

時有一客買柴，使令送至客店，客收去。

能得錢，卻出門外，見一客誦經。

能一聞經云：應無所住而生其心，心即開悟，遂問客誦何經？

客曰：《金剛經》。

復問：從何所來，持此經典？

客云：「我從蘄州黃梅縣東禪寺來，其寺是五祖忍大師在彼主化，門人一千有餘。我到彼中禮拜，聽受此經。大師常勸僧俗，但持《金剛經》即自見性，直了成佛。」

能聞說，宿昔有緣，乃蒙一客取銀十兩與能，令充老母衣糧，教便往黃梅禮拜五祖。能安置母畢，即便辭親，不經三十餘日，便至黃梅，禮拜五祖。

【B4】

祖問能曰：「汝何方人，欲求何物？」

能對曰：「弟子是嶺南新州百姓，遠來禮師，惟求作佛，不求餘物。」

祖言：「汝是嶺南人，又是獼獠，若為堪作佛？」

能曰：「人雖有南北，佛性本無南北；獼獠身與和尚不同，佛性有何差別？」

祖更欲與語，且見徒眾總在左右，乃令隨眾作務。

◎予曰：「惠能啟和尚：弟子自心，常生智慧，不離自性，即是福田，未審和尚，教作何務？」

祖云：「這獼獠根性大利，汝更勿言，著{槽}廠去！」

能退至後院。

有一行者差能破柴踏碓，經八餘月。

◎祖一日見能曰：「吾思汝之見可用，恐有惡人害汝，遂不與汝言，知之否？」

能曰：「弟子亦知師意，不敢行至堂前，令人不覺。」

【B5】

祖一日喚諸門人總來：「吾向汝說，世人生死事大。汝等終日，只求福田，不求出離生死苦海。自性若迷，福何可救？汝等各去，自看智慧，取自本心般若之性，各作一偈，來呈吾看。

若悟大意，付汝衣法，為第六代祖。火急速去，不得遲滯。思量即不中用。見性之人，言下須見。

若如此者，輪刀上陣，亦得見之。」

眾得處分，退而遞相謂曰：「我等眾人，不須澄心用意作偈，將呈和尚，有何所益？神秀上座現為教授師，必是他得。我輩謾作偈頌，枉用心力。」

諸人聞語，總皆息心，咸言：「我等已後依止秀師，何煩作偈！」

【B6】

神秀思惟：「諸人不呈偈者，為我與他為教授師，我須作偈，將呈和尚。若不呈偈，和尚如何知我心中見解深淺？」

我呈偈意，求法即善，覓祖即惡，卻同凡心，奪其聖位奚別？若不呈偈，終不得法，大難大難！」

【B7】

五祖堂前，有步廊三間，擬請供奉盧珍，畫《楞伽經》變相及五祖血脈圖流傳供養。

【B8】

◎神秀作偈成已，數度欲呈，行至堂前，心中恍惚，遍體汗流，擬呈不得。前後經四日，一十三度呈偈不得。

秀乃思惟：「不如向廊下書著，從他和尚看見，忽若道好，即出禮拜，云是秀作。若道不堪，枉向山中數年受人禮拜，更修何道！」

是夜三更，不使人知，自執燈，書偈於南廊壁間，呈心所見。

偈曰：

身是菩提樹，心如明鏡臺，時時勤拂拭，勿使惹塵埃。

秀書偈了，便卻歸房，人總不知。

秀復思惟：「五祖明日見偈歡喜，即我與法有緣。若言不堪，自是我迷，宿業障重不合得法。聖意難測。」

房中思想，坐臥不安，直至五更。

【B9】

祖已知神秀入門未得，不見自性。

天明，祖喚盧供奉來，向南廊壁間繪畫圖相。忽見其偈，報言：「供奉卻不用畫，勞爾遠來。經云：『凡所有相，皆是虛妄。』但留此偈，與人誦持。依此偈修，免墮惡道。依此偈修，有大利益。」

令門人炷香禮敬，盡誦此偈，即得見性。

門人誦偈，皆歎善哉！

祖三更喚秀入堂，問曰：「偈是汝作否？」

秀言：「實是秀作。不敢妄求祖位，望和尚慈悲，看弟子有少智慧否？」

祖曰：「汝作此偈，未見本性，只到門外，未入門內。如此見解，覓無上菩提了不可得。無上菩提須得言下識自本心，見自本性，不生不滅。於一切時中念念自見萬法無滯，一真一切真，萬境自如如。如如之心，即是真實，若如是見，即是無上菩提之自性也。汝且去一兩日思惟，更作一偈，將來吾看。汝偈若入得門，付汝衣法。」

神秀作禮而出。

又經數日，作偈不成。

心中恍惚，神思不安，猶如夢中，行坐不樂。

【B10】

復兩日，有一童子於碓房過，唱誦其偈。

能一聞，便知此偈未見本性。雖未蒙教授，早識大意，遂問童子曰：「誦者何偈？」

童子言：「爾這獗獠！不知大師言世人生死事大，欲得傳付衣法，令門人作偈來看。若悟大意，即付衣法為第六祖。」

神秀上座於南廊壁上書無相偈，大師令人皆誦此偈，依此偈修，免墮惡道。{依此偈修，有大利益。}

能曰：「我亦要誦此，結來生緣，同生佛地。上人！我此踏碓八箇餘月，未曾行到堂前。望上人引至偈前禮拜。」

【B11】

童子引至偈前作禮。能曰：「能不識字，請上人為讀。」

時有江州別駕，姓張名日用，便高聲讀。能聞已，因自言：「亦有一偈，望別駕為書。」別駕言：「獗獠！汝亦作偈，其事稀有！」

能啟別駕言：「欲學無上菩提，不得輕於初學。下下人有上上智，上上人有沒意智。若輕人，即有無量無邊罪。」

別駕言：「汝但誦偈，吾為汝書，汝若得法，先須度吾，勿忘此言。」

能偈曰：

菩提本無樹，明鏡亦非臺，本來無一物，何處惹塵埃？

書此偈已，徒眾總驚，無不嗟訝，各相謂言：「奇哉！不得以貌取人。何得多時，使他肉身菩薩？」

【B12】

祖見眾人驚怪，恐人損害，遂將鞋擦了偈云：「亦未見性。」

眾人疑息。

◎次日，祖潛至碓坊，見能腰石舂米，語曰：「求道之人，為法忘軀，當如是乎！」即問曰：「米熟也未？」

能曰：「米熟久矣，猶欠篩在。」

【B13】

祖以杖擊碓三下而去。能即會祖意，三鼓入室。

祖以袈裟遮圍，不令人見，為說《金剛經》，至應無所住而生其心，能言下大悟一切萬法不離自性，遂啟祖言：

何期自性本自清淨，何期自性本不生滅，何期自性本自具足，
何期自性本無動搖，何期自性能生萬法。

祖知悟本性，{ 謂能曰：「不識本心，學法無益，若識本心，見自本性， }
即名丈夫、天人師、佛。」

三更受法，人盡不知。便傳頓教及衣鉢云：「汝為第六代祖，善自護
念，廣度有情，流布將來，無令斷絕。」

◎聽吾偈曰：

有情來下種，因地果還生，無情既無種，無性亦無生。

【B14】

祖復曰：「昔達磨大師初來此土，人未之信，故傳此衣以為信體，代
代相承。法則以心傳心，皆令自悟自解。自古佛佛惟傳本體，師師密
付本心。衣為爭端，止汝勿傳。若傳此衣，命如懸絲。汝須速去，恐
人害汝。」

◎能曰：「向甚處去？」

祖云：「逢懷則止，遇會則藏。」

惠能三更領得衣鉢云：「能本是南中人，久不知此山路，如何出得江
口？」

五祖言：「汝不須憂，吾自送汝。」

祖相送直至九江驛邊。

◎有一隻船子，祖令惠能上船。五祖把櫂自搖。

惠能言：「請和尚坐，弟子合搖櫂。」

五祖云：「合是吾渡汝。」

能云：「迷時師度，悟了自度。度名雖一，用處不同。惠能生在邊方，
語音不正，蒙師付法，今已得悟，只合自性自度。」

祖云：「如是如是。以後佛法由汝大行。汝去三年，吾方逝世。汝今
好去，努力向南。不宜速說，佛法難起。」

【B15】

能辭違祖已，發足南行。兩月中間，至大庾嶺。

五祖歸，數日不上堂。眾疑詣問曰：和尚少病少惱否？

曰：病即無，衣法已南矣。

問：誰人傳授？

曰：能者得之。眾乃知焉。

遂後數百人來，欲奪衣鉢。

一僧俗姓陳，名惠明，先是四品將軍，性行羸慥，極意參尋，為眾人先，趁及於能。

能擲下衣鉢於石上云：此衣表信，可力爭耶？能隱於草莽中。

惠明至，提掇不動，乃喚云：「行者！行者！我為法來，不為衣來。」

能遂出，坐盤石上。

惠明作禮云：「望行者為我說法。」

◎能云：「汝既為法而來，可屏息諸緣，勿生一念。吾為汝說。」

良久謂明曰：「不思善，不思惡，正與麼時，那箇是明上座本來面目？」

惠明言下大悟。

◎復問云：「上來密語密意外，還更有密意否？」

能云：「與汝說者，即非密也。汝若返照，密在汝邊。」

明曰：「惠明雖在黃梅，實未省自己面目。今蒙指示，如人飲水，冷暖自知，今行者即惠明師也。」

能曰：「汝若如是，吾與汝同師黃梅，善自護持。」

明又問：「惠明今後向甚處去？」

能曰：「逢袁則止，遇蒙則居。」明禮辭。

明回至嶺下，謂趁眾曰：「向陡崔嵬，竟無蹤跡，當別道尋之。」

趁眾咸以為然。[惠明後改道明，避師上字。]

◎能後至曹溪，又被惡人尋逐。

乃於四會縣，避難獵人隊中，凡經一十五載。

時與獵人隨宜說法。獵人常令守網。每見生命，盡放之。

每至飯時，以菜寄煮肉鍋。

或問，則對曰：「但喫肉邊菜。」

一日思惟：時當弘法，不可終遯。遂出至廣州法性寺。

值印宗法師講《涅槃經》。

時有風吹幡動。

一僧云：風動。一僧云：幡動。議論不已。

能進曰：「不是風動，不是幡動，仁者心動。」

一眾駭然。

印宗延至上席，徵詰奧義。見能言簡理當，不由文字。

宗云：「行者定非常人，久聞黃梅衣法南來，莫是行者否？」

能曰：「不敢。」

宗於是執弟子禮，告請傳來衣鉢，出示大眾。

宗復問曰：「黃梅付囑，如何指授？」

能曰：「指授即無，唯論見性，不論禪定解脫。」

宗曰：「何不論禪定解脫？」

謂曰：「為是二法，不是佛法，佛法是不二之法。」

宗又問：「如何是佛法不二之法？」

能曰：「法師講《涅槃經》，經明見佛性是佛法不二之法，如《涅槃經》高貴德王菩薩白佛言：犯四重禁，作五逆罪及一闍提等，當斷善根佛性否？佛言：善根有二，一者常，二者無常。佛性非常非無常，是故不斷，名為不二。一者善，二者不善。佛性非善非不善，是名不二。蘊之與界，凡夫見二，智者了達其性無二。無二之性，即是佛性。」印宗聞說，歡喜合掌言：「某甲講經，猶如瓦礫。仁者論義，猶如真金。」於是為能剃髮，願事為師。能遂於菩提樹下，開東山法門。

【B16】

能於東山得法，辛苦受盡，命似懸絲。今日得與史君、官僚、僧尼、道俗同此一會，莫非累劫之因。亦是過去生中，供養諸佛，同種善根，方始得聞如上頓教得法之因。

教是先聖所傳，不是惠能自智。

【B17】

願聞先聖教者，各令淨心，聞了各自除疑，如先世聖人無別。

【第三摩訶般若品】

【C1】（德異本編號）

師復告眾曰：善知識！菩提般若之智，世人本自有之。只緣心迷，不能自悟，須假大善知識示導見性。當知愚人、智人，佛性本無差別，只緣迷悟不同，所以有愚、有智。

【C2】

吾今為說摩訶般若波羅蜜法，使汝等各得智慧。

志心諦聽！吾為汝說。

◎善知識！世人終日口念般若，不識自性般若。猶如說食不飽，口但說空，萬劫不得見性，終無有益。

善知識！摩訶般若波羅蜜，是梵語，此言大智慧到彼岸。此須心行，不在口念，口念心不行，如幻如化，如露如電。口念心行，則心口相應。本性是佛，離性無別佛。

【C3】

何名摩訶？摩訶是大。心量廣大，猶如虛空。

◎無有邊畔，亦無方圓大小，亦非青黃赤白，亦無上下長短，亦無瞋無喜，無是無非，無善無惡，無有頭尾。諸佛剎土，盡同虛空。世人妙性本空，無有一法可得。自性真空，亦復如是。

善知識！莫聞吾說空便即著空。第一莫著空。

若空心靜坐，即著無記空。

善知識！世界虛空，能含萬物色像。日月星宿，山河大地，泉源溪澗，草木叢林，惡人善人，惡法善法，天堂地獄，一切大海，須彌諸山，總在空中。世人性空，亦復如是。

善知識！自性能含萬法，是大。萬法在諸人性中。若見一切人，惡之與善，盡皆不取不捨，亦不染著，心如虛空，名之為大，故曰摩訶。

善知識！迷人口說，智者心行。又有迷人，空心靜坐，百無所思，自稱為大。此一輩人，不可與語，為邪見故。

◎善知識！心量廣大，遍周法界。用即了了分明，應用便知一切。一切即一，一即一切，去來自由，心體無滯，即是般若。

善知識！一切般若智，皆從自性而生，不從外入，莫錯用意，名為真性自用。一真一切真。心量大事，不行小道。口莫終日說空，心中不修此行，恰似凡人自稱國王，終不可得。非吾弟子。

【C4】

善知識！何名般若？般若者，唐言智慧也。

一切處所，一切時中，念念不愚，常行智慧，即是般若行。

一念愚即般若絕。一念智即般若生。

世人愚迷，不見般若。口說般若，心中常愚。當自言我修般若，念念說空，不識真空。

般若無形相，智慧心即是。若作如是解，即名般若智。

【C5】

何名波羅蜜？此西國語，唐言到彼岸。

解義離生滅，著境生滅起，如水有波浪，即名為此岸。離境無生滅，如水常通流，即名為彼岸，故號波羅蜜。

【C6】

善知識！迷人口念，當念之時，有妄有非。

念念若行，是名真性。悟此法者，是般若法。

此行者，是般若行。不修即凡，一念修行，自身等佛。

善知識！凡夫即佛，煩惱即菩提。
前念迷即凡夫，後念悟即佛。
前念著境，即煩惱；後念離境，即菩提。

【C7】

善知識！摩訶般若波羅蜜，最尊、最上、最第一、無住、無往亦無來，三世諸佛皆從中出。當用大智慧，打破五蘊煩惱塵勞。如此修行，定成佛道，變三毒為戒定慧。

【C8】

善知識！我此法門，從般若生八萬四千智慧，何以故？為世人有八萬四千塵勞。若無塵勞，智慧常現，不離自性。
悟此法者，即是無念、無憶、無著，不起誑妄，用自真如性，以智慧觀照，於一切法不取、不捨，即是見性成佛道。

【C9】

善知識！若欲入甚深法界及般若三昧者，須修般若行，持誦《金剛般若經》，即得見性。當知此功德無量無邊，經中分明讚歎，莫能具說。此法門是最上乘，為大智人說，為上根人說。小根小智人聞，心生不信。

譬如天龍，下雨於閻浮提，城邑、聚落，悉皆漂流，如漂棗葉；若雨大海，不增不減。

【C10】

若大乘人，若最上乘人，聞說《金剛經》，心開悟解。
故知本性自有般若之智，自用智慧常觀照故，不假文字。
譬如雨水，不從天有，元是龍能興致，令一切眾生、一切草木、有情無情，悉皆蒙潤，百川眾流，卻入大海，合為一體。
眾生本性般若之智，亦復如是。

【C11】

善知識！小根之人，聞此頓教，猶如草木根性小者，若被大雨，悉皆自倒，不能增長。

小根之人，亦復如是。元有般若之智，與大智人更無差別，因何聞法不自開悟？

緣邪見障重、煩惱根深。

猶如大雲覆蓋於日，不得風吹，日光不現。

般若之智，亦無大小，為一切眾生自心迷悟不同。

迷心外見，修行覓佛，未悟自性，即是小根。

若{聞}頓教，不執外修，但於自心，常起正見，煩惱塵勞常不能染，即是見性。

善知識！內外不住，去來自由，去除執心，通達無礙，能修此行，與《般若經》本無差別。

【C12】

善知識！一切修多羅及諸文字、大小二乘、十二部經，皆因人置，因智慧性，方能建立。

若無世人，一切萬法本自不有，故知萬法本自人興，一切經書因人說有。緣其人中，有愚有智，愚為小人，智為大人。

愚者問於智人，智者與愚人說法，愚人忽然悟解心開，即與智人無別。

善知識！不悟，即佛是眾生；一念悟時，眾生是佛。

故知萬法盡在自心，何不從自心中頓見真如本性？

【C13】

《菩薩戒經》云：「{本源}自性清淨。」若識自心見性皆成佛道。

《淨名經》云：「即時豁然，還得本心。」

【C14】

善知識！我於忍和尚處一聞，言下便悟，頓見真如本性。

是以將此教法流行，令學道者頓悟菩提，各自觀心，自見本性。

【C15】

若自不悟，須覓大善知識解最上乘法者，直示正路。

是大善知識有大因緣，所謂化導令得見性。

一切善法，因善知識能發起故。三世諸佛、十二部經，在人性中本自具有，不能自悟，須求善知識指示方見。

若自悟者，不假外求。

若一向執，謂須要他善知識望得解脫者，無有是處。

何以故？自心內有知識自悟。

若起邪迷，妄念顛倒，外善知識雖有教授，救不可得。

若起正真般若觀照，一剎那間妄念俱滅，若識自性，一悟即至佛地。

善知識！智慧觀照，內外明徹，識自本心。

若識本心，即本解脫；若得解脫，即是般若三昧。

般若三昧，即是無念。

【C16】

何名無念？

若見一切法，心不染著，是為無念，用即遍一切處，亦不著一切處。

但淨本心，使六識出六門，於六塵中無染無雜，來去自由，通用無滯，即是般若三昧，自在解脫，名無念行。

若百物不思，當令念絕，即是法縛，即名邊見。

善知識！悟無念法者，萬法盡通。

悟無念法者，見諸佛境界。

悟無念法者，至佛地位。

【C17】

善知識！後代得吾法者，將此頓教法門，於同見同行，發願受持，如事佛故終身而不退者，定入聖位。

然須傳授，從上以來，默傳分付，不得匿其正法。

【C18】

若不同見同行，在別法中，不得傳付。損彼前人，究竟無益。恐愚人不解，謗此法門，百劫、千生斷佛種性。

【D1】

善知識！吾有一《無相頌》，各須誦取。在家出家，但依此修。若不自修，惟記吾言，亦無有益。聽吾頌曰：

說通及心通，如日處虛空，唯傳見性法，出世破邪宗。
法即無頓漸，迷悟有遲疾，只此見性門，愚人不可悉。
說即雖萬般，合理還歸一，煩惱暗宅中，常須生慧日。
邪來煩惱至，正來煩惱除，邪正俱不用，清淨至無餘。
菩提本自性，起心即是妄，淨心在妄中，但正無三障。
世人若修道，一切盡不妨，常自見己過，與道即相當。
色類自有道，各不相妨惱，離道別覓道，終身不見道。
波波度一生，到頭還自懊，欲得見真道，行正即是道。
自若無道心，闇行不見道，若真修道人，不見世間過。
若見他人非，自非卻是左，他非我不非，我非自有過。
但自卻非心，打除煩惱破，憎愛不關心，長伸兩腳臥。
欲擬化他人，自須有方便，勿令彼有疑，即是自性現。
佛法在世間，不離世間覺，離世覓菩提，恰如求兔角。
正見名出世，邪見是世間，邪正盡打卻，菩提性宛然。
此頌是頓教，亦名大法船，迷聞經累劫，悟則剎那間。

【D2】

師復曰：今於大梵寺說此頓教，普願法界眾生言下見性成佛。

【D3】

時韋史君與官僚、道俗聞師所說，無不省悟。
一時作禮，皆歎善哉！何期嶺南有佛出世。

【第四功德淨土品】

【E1】（德異本編號）

次日，韋刺史為師設大會齋。

齋訖，刺史請師陞座，同官僚、士庶，肅容再拜，問曰：「弟子聞和尚說法，實不可思議。今有少疑，願大慈悲，特為解說。」

師曰：「有疑即問，吾當為說。」

韋公曰：「和尚所說可不是達摩大師宗旨乎？」

師曰：「是。」

【E2】

公曰：「弟子聞達摩初化梁武帝。帝問云：朕一生造寺、供僧、佈施、設齋有何功德？達摩言：實無功德。弟子未達此理，願和尚為說。」

師曰：「實無功德，勿疑先聖之言。武帝心邪，不知正法。

造寺、供養、佈施、設齋，名為求福，不可將福便為功德。

功德在法身中，不在修福。」

師又曰：「見性是功，平等是德。

念念無滯，見本性真實妙用，名為功德。

內心謙下是功，外行於禮是德。自性建立萬法是功，心體離念是德。

不離自性是功，應用無染是德。

若覓功德法身，但依此作，是真功德。

若修功德之人，心即不輕，常行普敬。

心常輕人，吾我不斷，即自無功。自性虛妄不實，即自無德，為吾我自大，常輕一切故。

善知識！念念無間是功，心行平直是德。自修性是功，自修身是德。

善知識！功德須自性內見，不是佈施、供養之所求也。

是以福德與功德別。

武帝不識真理，非我祖師有過。」

【E3】

又問：「弟子常見僧俗，念阿彌陀佛，願生西方，請和尚說，得生彼否？願為破疑。」

【E4】

師言：「使君善聽！惠能與說。世尊在舍衛城中，說西方引化，經文分明，去此不遠。若論相說，里數有十萬八千，即身中十惡八邪，便是說遠。說遠為其下根，說近為其上智。

人有兩種，法無兩般。迷悟有殊，見有遲疾。

迷人念佛求生於彼，悟人自淨其心。所以佛言：隨其心淨即佛土淨。

使君！東方人但心淨即無罪，雖西方人心不淨亦有愆。

東方人造罪，念佛求生西方；西方人造罪，念佛求生何國？

凡愚不了自性，不識身中淨土，願東、願西。

悟人在處一般，所以佛言：隨所住處恆安樂。

使君！心地但無不善，西方去此不遙。若懷不善之心，念佛往生難到。

今勸善知識，先除十惡即行十萬。後除八邪乃過八千。

念念見性，常行平直，到如彈指，便覩彌陀。

使君！但行十善，何須更願往生？不斷十惡之心，何佛即來迎請？

若悟無生頓法，見西方只在剎那；不悟，念佛求生，路遙如何得達？

惠能與諸人移西方於剎那間，目前便見，各願見否？」

【E5】

眾皆頂禮云：「若此處見，何須更願往生？願和尚慈悲，便現西方，普令得見。」

【E6】

師言：「大眾！世人自色身是城，眼、耳、鼻、舌是門，外有五門，內有意門。心是地，性是王。王居心地上。性在王在，性去王無。性在身心存，性去身心壞。佛向性中作，莫向身外求。自性迷，即是眾生；自性覺，即是佛。

慈悲即是觀音，喜捨名為勢至，能淨即釋迦，平直即彌陀。

人我是須彌，邪心是海水，煩惱是波浪，毒害是惡龍，虛妄是鬼神，塵勞是魚鱉，貪瞋是地獄，愚癡是畜生。

善知識！常行十善，天堂便至。除人我，須彌倒。無邪心，海水竭。煩惱無，波浪滅。毒害除，魚龍絕。

自心地上，覺性如來放大光明，外照六門清淨，能破六欲諸天；自性內照，三毒即除，地獄等罪一時消滅，內外明徹，不異西方。不作此修，如何到彼？」

大眾聞說，了然見性，悉皆禮拜，俱歎善哉！唱言：「普願法界眾生，聞者一時悟解。」

【E7】

師言：「善知識！若欲修行，在家亦得，不由在寺。在家能行，如東方人心善。在寺不修，如西方人心惡。但心清淨，即是自性西方。」

【E8】

韋公又問：「在家如何修行？願為教授。」

【E9】

師言：「吾與大眾作《無相頌》。但依此修，常與吾同處無別。若不依此修，剃髮出家，於道何益？」

◎頌曰：

心平何勞持戒？行直何用修禪？

恩則親養父母，義則上下相憐；讓則尊卑和睦，忍則眾惡無喧。
若能鑽木出火，淤泥定生紅蓮；苦口的是良藥，逆耳必是忠言。
改過必生智慧，護短心內非賢；日用常行饒益，成道非由施錢。
菩提只向心覓，何勞向外求玄？聽說依此修行，天堂只在目前。

【F1】

師復曰：善知識！總須依偈修行，見取自性，直成佛道。法不相待。眾人且散，吾歸曹溪。眾若有疑，卻來相問。

【F2】

時刺史、官僚，在會善男信女，各得開悟，信受奉行。

【第五定慧一體品】

【G1】（德異本編號）

師示眾云：善知識！我此法門以定慧為本。大眾勿迷，言定慧別。定慧一體，不是二；定是慧體，慧是定用。即慧之時定在慧，即定之時慧在定。若識此義，即是定慧等學。諸學道人，莫言：「先定發慧，先慧發定，{慧定}各別。」

作此見者，法有二相：口說善語，心中不善，空有定慧，定慧不等。若心口俱善，內外一種，定慧即等。自悟修行，不在於諍。若諍先後，即同迷人。不斷勝負，卻增我法，不離四相。

【G2】

善知識！一行三昧者，於一切處，行、住、坐、臥常行一直心是也。

如《淨名經》云：「直心是道場，直心是淨土。」莫心行諂曲，口但說直、口說一行三昧，不行直心。但行直心，於一切法勿有執著。

【G3】

迷人著法相，執一行三昧，直言：「坐不動，{除}妄不起心，即是一行三昧。」作此解者，即同無情，卻是障道因緣。

善知識！道須通流，何以卻滯？心不住法，道即通流；心若住法，名為自縛。若言坐不動是，只如舍利弗宴坐林中，卻被維摩詰訶。

善知識！又有人教坐，看心 {看淨}，不動不起，從此置功。迷人不曾，便執成顛，如此者眾，如是相教，故知大錯。

【G4】

善知識！定、慧猶如何等？猶如燈、光：有燈即光，無燈即暗。燈是光之體，光是燈之用，名雖有二，體本同一。

此定、慧法，亦復如是。

善知識！本來正教無有頓漸，人性自有利鈍。迷人漸契，悟人頓修。自識本心，自見本性，即無差別。所以立頓漸之假名。

【G5】

善知識！我此法門，從上以來，先立：無念為宗，無相為體，無住為本。

【G6】

無相者，於相而離相。

【G7】

無念者，於念而無念。

【G8】

無住者，人之本性。於世間善惡、好醜，乃至冤之與親，言語觸刺、欺爭之時，並將為空，不思酬害。

念念之中，不思前境。{前念}、今念、後念，念念相續不斷，{於一切法上無住。一念若住，念念即住}，名為繫縛。

於諸法上念念不住，即無縛也，此是以無住為本。

【G9】

善知識！外離一切相，名為無相。能離於相，即法體清淨，此是以無相為體。

【G10】

善知識！於諸境上心不染，曰無念，於自念上常離諸境，不於境上生心。若只百物不思，念盡除卻，一念絕即死，別處受生，是為大錯。

學道者思之！若不識法意，自錯猶可，更勸他人，自迷不見，又謗佛經。所以立無念為宗。

善知識！云何立無念為宗？

只緣口說見性，迷人於境上有念，念上便起邪見，一切塵勞妄想從此而生。自性本無一法可得。若有所得，妄說禍福，即是塵勞邪見。故此法門立無念為宗。

善知識！無者無何事？念者念何物？

無者，無二相，無諸塵勞之心。

念者，念真如本性。真如即是念之體。念即是真如之用。

真如自性起念，非眼、耳、鼻、舌能念。

真如有性，所以起念。

真如若無，眼、耳、色、聲當時即壞。

善知識！真如自性起念，六根雖有見聞覺知，不染萬境而真性常自在。

故云：「能善分別諸法相，於第一義而不動。」

【第六教授坐禪品】

【G11】（德異本編號）

師示眾云：善知識！何名坐禪？此法門中無障無礙，外於一切善惡境界，心念不起，名為坐；內見自性不動，名為禪。

【G12】

善知識！何名禪定？外離相為禪，內不亂為定。外若著相，內心即亂。外若離相，心即不亂，本性自淨、自定。只為見境、思境即亂。若見諸境心不亂者，是真定也。

善知識！外離相即禪，內不亂即定。外禪內定，是為禪定。

【G13】

《淨名經》云：「即時豁然，還得本心」，《菩薩戒經》云：「{本源自性}清淨。」

【G14】

善知識！於念念中自見本性清淨，自修自行，自成佛道。

【G15】

然此門坐禪，元不{看}心，亦不{看}淨，亦不是不動。若言{看}心，心元是妄，知心如幻，故無所{看}也。

若言{看}淨，人性本淨，由妄念故，蓋覆真如，但無妄想，性自清淨。起心{看}淨，卻生淨妄，妄無處所，{看}者是妄。淨無形相，卻立淨相，言是工夫，作此見者，障自本性，卻被淨縛。

善知識！若修不動者，但見一切人時，不見人之是非、善惡、過患，即自性不動。

善知識！迷人身雖不動，開口便說他人是非、長短、好惡，與道違背。若{看}心{看}淨，卻障道也。

【第七傳戒歸依品】

【H1】（德異本編號）

時大師見廣韶泊四方士庶駢集山中聽法，於是升座告眾曰：來！善知識！此事須從自性中起，於一切時念念自淨其心，自修自行，見自己法身，見自心佛，自度自戒，始得不假到此。既從遠來，一會於此，皆共有緣，今可各各胡跪。

先為傳自性五分法身香，次授無相懺悔。眾胡跪。

師曰：

一、戒香，即自心中無非、無惡、無嫉妬、無貪瞋、無劫害，名戒香。

二、定香，即觀諸善惡境相，自心不亂，名定香。

三、慧香，自心無礙，常以智慧觀照自性，不造諸惡。雖修眾善，心不執著；敬上念下，矜恤孤貧，名慧香。

四、解脫香，即自心無所攀緣，不思善，不思惡，自在無礙，名解脫香。

五、解脫知見香，自心既無所攀緣善惡，不可沈空守寂，即須廣學多聞，識自本心，達諸佛理，{言滿天下無口過，行滿天下無怨惡，}和光接物，無我無人，直至菩提真性不易，名解脫知見香。

善知識！此香各自內薰，莫向外覓。

【H2】

今與汝等授無相懺悔，滅三世罪，令得三業清淨。

善知識！各隨語，一時道：

弟子等，從前念、今念及後念，念念不被愚迷染。

從前所有惡業、愚迷等罪，悉皆懺悔。願一時消滅，永不復起。

弟子等，從前念、今念及後念，念念不被僞誑染。

從前所作惡業、僞誑等罪，{悉皆懺悔}。願一時消滅，永不復起。

弟子等，從前念、今念及後念，念念不被嫉妬染。
所有惡業、嫉妬等罪，悉皆懺悔。願一時消滅，永不復起。

【H3】

善知識！已上是為無相懺悔。云何名懺？云何名悔？懺者，懺其前愆，從前所有惡業、愚迷、僞誑、嫉妬等罪，悉皆盡懺，永不復起，是名為懺。悔者，悔其後過，從今以後，所有惡業、愚迷、僞誑、嫉妬等罪，今已覺悟，悉皆永斷，更不復作，是名為悔。故稱懺悔。凡夫愚迷，只知懺其前愆，不知悔其後過。以不悔故，前愆不滅，後過又生。前愆既不滅，後過復又生，何名懺悔！

【I1】

善知識！既懺悔已，與善知識發四弘誓願。各須用心正聽：
自心眾生無邊誓願度，自心煩惱無邊誓願斷，
自性法門無盡誓願學，自性無上佛道誓願成。

【I2】

善知識！大家豈不道，眾生無邊誓願度，恁麼道，且不是惠能度。
善知識！心中眾生，所謂邪迷心、誑妄心、不善心、嫉妬心、惡毒心，如是等心，盡是眾生。各須自性自度，是名真度。

何名自性自度？

即自心中，邪見、煩惱、愚癡眾生，將正見度。

既有正見，使般若智打破愚癡、迷妄眾生，各各自度。

邪來正度，迷來悟度，愚來智度，惡來善度。

如是度者，名為真度。

【I3】

又煩惱無邊誓願斷，將自性般若智，除卻虛妄思想心是也。

【I4】

又法門無盡誓願學，須自見性，常行正法，是名真學。

【I5】

又無上佛道誓願成，既常能下心，行於正直，離迷離覺，常生般若，除真除妄，即見佛性，即言下佛道成，常念修行，是願力法。

【J1】

善知識！今發四弘願了，更與善知識授無相三歸依戒：

善知識！歸依覺，二足尊。歸依正，離欲尊。歸依淨，眾中尊。

從今日去，稱覺為師，更不歸依邪魔外道。

以自性三寶常自證明！

【J2】

勸善知識歸依自性三寶。

佛者，覺也。法者，正也。僧者，淨也。

【J3】

自心歸依覺，邪迷不生，少欲知足，能離財色，名二足尊。

【J4】

自心歸依正，念念無邪見。以無邪見故，即無人我、貢高、貪愛、執著，名離欲尊。

【J5】

自心歸依淨，一切塵勞、愛欲境界，自性皆不染著，名眾中尊。

【J6】

若修此行，是自歸依。凡夫不會，從日至夜，受三歸戒。若言歸依佛，佛在何處？若不見佛，憑何所歸？言卻成妄。

善知識！各自觀察，莫錯用心。

經文分明言自歸依佛，不言歸依他佛。自佛不歸，無所依處。

今既自悟，各須歸依自心三寶。

內調心性，外敬他人，是自歸依也。

【K1】

善知識！既歸依自三寶竟，各各志心，吾與說一體三身自性佛，令汝等見三身了然，自悟自性，總隨我道：

於自色身，歸依清淨法身佛。

於自色身，歸依千百億化身佛。

於自色身，歸依圓滿報身佛。

【K2】

善知識！色身是舍宅，不可言歸。向者三身佛在自性中，世人總有，為自心迷，不見內性，外覓三身如來，不見自身中有三身佛。

汝等聽說，令汝等於自身中，見自性有三身佛。此三身佛從自性生，不從外得。

【K3】

何名清淨法身？

世人性本清淨，萬法從自性生：思量一切惡事，即生惡行；思量一切善事，即生善行，如是諸法，在自性中。如天常清，日日常明，為浮雲蓋覆，上明下暗，忽遇風吹雲散，上下俱明，萬象皆現。世人性常浮游，如彼天雲。

善知識！智如日，慧如月，智慧常明。於外著境，被妄念浮雲蓋覆自性，不得明朗。若遇善知識聞真正法，自除迷妄，內外明徹，於自性中萬法皆現。見性之人，亦復如是。此名清淨法身佛。

善知識！自心歸依自性，是歸依真佛。自歸依者，除卻自性中不善心、嫉妬心、憍慢心、吾我心、誑妄心、輕人心、慢人心、邪見心、貢高心及一切時中不善之行，常自見己過，不說他人好惡，是自歸依。常須下心，普行恭敬，即是見性通達，更無滯礙，是自歸依。

【K4】

何名千百億化身？

若不思，萬法性本如空。一念思量，名為變化：思量惡事化為地獄，思量善事化為天堂，毒害化為龍蛇，慈悲化為菩薩，智慧化為上界，愚癡化為下方。自性變化甚多，迷人不能省覺，念念起惡，常行惡道。迴一念善，智慧即生，此名自性化身佛。

【K5】

何名圓滿報身？

譬如一燈能除千年暗，一智能滅萬年愚。莫思向前，已過不可得。常思於後，念念圓明，自見本性。善惡雖殊，本性無二。無二之性，名為實性。於實性中，不染善惡，此名圓滿報身佛。自性起一念惡，滅萬劫善因。自性起一念善，得恆沙惡盡，直至無上菩提，念念自見，不失本念，名為報身。

【K6】

善知識！從法身思量即是化身佛。

念念自性自見，即是報身佛。

自悟自修自性功德，是真歸依。

皮肉是色身，色身是舍宅，不言歸依也。

但悟自性三身，即識自性佛。

【L1】

吾有一《無相頌》，若能誦持，言下令汝積劫迷罪一時消滅。

頌曰：

迷人修福不修道，只言修福便是道，
佈施供養福無邊，心中三惡元來造。
擬將修福欲滅罪，後世得福罪還在，
但向心中除罪緣，各自性中真懺悔。

忽悟大乘真懺悔，除邪行正即無罪，
學道常於自性觀，即與諸佛同一類。
吾祖惟傳此頓法，普願見性同一體，
若欲當來覓法身，離諸法相心中洗。
努力自見莫悠悠，後念忽絕一世休，
若悟大乘得見性，虔恭合掌至心求。

【L2】

師言：善知識！總須誦取。依此修行，言下見性，雖去吾千里，如常在吾邊。於此言下不悟，即對面千里，何勤遠來？珍重好去！

【L3】

一眾聞法，靡不開悟，歡喜奉行。

六祖法寶記終

六祖大師法寶壇經

〈契嵩短本〉

出處：《明版洪武南藏》六祖大師法寶壇經

【第一眾請說法品】

【A1】（德異本編號）

時祖師至寶林。韶州韋刺史璩，與官僚入山，請師出於城中大梵寺講堂，為眾開緣說法。

師升座次，刺史官僚三十餘人、儒宗學士三十餘人、僧尼道俗一千餘人，同時作禮，願聞法要。

【第二悟法傳衣品】

【B1】（德異本編號）

大師告眾曰：善知識！總淨心念摩訶般若波羅蜜。

【B2】

大師良久，復告眾曰：善知識！菩提自性，本來清淨，但用此心，直了成佛。

【B3】

善知識！且聽惠能行由，得法事意。

惠能嚴父，本貫范陽，左降流于嶺南，作新州百姓。

此身不幸，父又早亡。老母孤遺，移來南海。艱辛貧乏，於市賣柴。時有一客買柴，使令送至客店，客收去。惠能得錢，卻出門外，見一客誦經。

惠能一聞經云：應無所住而生其心，心即開悟，遂問客誦何經？客曰：《金剛經》。

復問：從何所來，持此經典？

客云：「我從蘄州黃梅縣東禪寺來，其寺是五祖忍大師在彼主化，門人一千有餘。我到彼中禮拜，聽受此經。大師常勸僧俗，但持《金剛經》即自見性，直了成佛。」

惠能聞說，欲往求法，念母無依，宿昔有緣，乃蒙一客取銀十兩與惠能，令充老母衣糧，教便往黃梅參禮五祖。惠能安置母畢，即便辭違，不經三十餘日，便至黃梅，禮拜五祖。

【B4】

祖問曰：「汝何方人，欲求何物？」

惠能對曰：「弟子是嶺南新州百姓，遠來禮師，惟求作佛，不求餘物。」

祖言：「汝是嶺南人，又是獼獠，若為堪作佛？」

惠能曰：「人雖有南北，佛性本無南北；獼獠身與和尚不同，佛性有何差別？」

祖更欲與語，且見徒眾總在左右，乃令隨眾作務。

◎惠能曰：「惠能啟和尚：弟子自心，常生智慧，不離自性，即是福田，未審和尚，教作何務？」

祖云：「這獼獠根性大利，汝更勿言，著槽廠去！」

惠能退至後院。

有一行者差惠能破柴踏碓，經八餘月。

◎祖一日忽見惠能曰：「吾思汝之見可用，恐有惡人害汝，遂不與言，汝知之否？」

惠能曰：「弟子亦知師意，不敢行至堂前，令人不覺。」

【B5】

祖一日喚諸門人總來：「吾向汝說，世人生死事大。汝等終日，只求福田，不求出離生死苦海。自性若迷，福何可救？汝等各去，自看智慧，取自本心般若之性，各作一偈，來呈吾看。

若悟大意，付汝衣法，為第六代祖。

火急速去，不得遲滯。思量即不中用。見性之人，言下須見。

若如此者，譬如輪刀上陣，亦得見之。」

眾得處分，退而遞相謂曰：「我等眾人，不須澄心用意作偈，將呈和尚，有何所益？神秀上座現為教授師，必是他得。

我輩謾作偈頌，枉用心力。」

餘人聞語，總皆息心，咸言：「我等已後依止秀師，何煩作偈！」

【B6】

神秀思惟：「諸人不呈偈者，為我與他為教授師，我須作偈，將呈和尚。若不呈偈，和尚如何知我心中見解深淺？」

我呈偈意，求法即善，覓祖即惡，卻同凡心，奪其聖位奚別？」

若不呈偈，終不得法，大難大難！」

【B7】

五祖堂前，有步廊三間，擬請供奉盧珍，畫《楞伽經》變相及五祖血脈圖流傳供養。

【B8】

◎神秀作偈成已，數度欲呈，行至堂前，心中恍惚，徧身汗流，前後經四日，一十三度呈偈不得。

秀乃思惟：「不如向廊下書著，從他和尚看見，忽若道好，即出禮拜，云是神秀作。若道不堪，枉向山中數年受人禮拜，更修何道！」

是夜三更，不使人知，自執燈，書偈於南廊壁間，呈心所見。偈曰：

身是菩提樹，心如明鏡臺，時時勤拂拭，勿使惹塵埃。

秀書偈了，便卻歸房，人總不知。

秀復思惟：「五祖明日見偈歡喜，即我與法有緣。若言不堪，自是我迷，宿業障重不合得法。聖意難測。」

房中思想，坐臥不安，直至五更。

【B9】

祖已知神秀入門未得，不見自性。

天明，祖喚盧供奉來，向南廊壁間繪畫圖相。忽見其偈，報言：「供奉卻不用畫，勞爾遠來。經云：『凡所有相，皆是虛妄。』但留此偈，與人誦持。依此偈修，免墮惡道。依此偈修，有大利益。」

令門人炷香禮敬，盡誦此偈，當得見性。門人誦偈，皆歎善哉！

祖三更喚秀入堂，問曰：「偈是汝作否？」

秀言：「實是秀作。不敢妄求祖位，望和尚慈悲，看弟子有少智慧否？」

祖曰：「汝作此偈，未見本性，只到門外，未入門內。如此見解，覓無上菩提終不可得。

無上菩提須得言下識自本心，見自本性，不生不滅。於一切時中念念自見萬法無滯，一真一切真，萬境自如如。如如之心，即是真實，若如是見，即是無上菩提之自性也。

汝且去思惟，更作一偈，將來吾看。汝偈若入得門，付汝衣法。」

神秀作禮而出。

又經數日，作偈不成。心中恍惚，神思不安，猶如夢中，行坐不樂。

【B10】

復兩日，有一童子於碓坊過，唱誦其偈。

惠能一聞，便知此偈未見本性。雖未蒙教授，早識大意。遂問童子曰：「誦者何偈？」

童子言：「爾這獗獗！不知大師言世人生死事大，欲得傳付衣法，令門人作偈來看。若悟大意，即付衣法為第六祖。」

神秀上座於南廊壁上書無相偈，大師令人皆誦，依此偈修，免墮惡道。依此偈修，有大利益。」

惠能曰：「上人！我此踏碓八箇餘月，未曾行到堂前。望上人引至偈前禮拜。」

【B11】

童子引至偈前禮拜。惠能曰：「惠能不識字，請上人為讀。」

時有江州別駕，姓張名日用，便高聲讀。

惠能聞已，遂言：「亦有一偈，望別駕為書。」

別駕言：「汝亦作偈，其事希有！」

惠能向別駕言：「欲學無上菩提，不得輕於初學。下下人有上上智，上上人有沒意智。」

別駕言：「汝但誦偈，吾為汝書，汝若得法，先須度吾，勿忘此言。」

惠能偈曰：

菩提本無樹，明鏡亦非臺，本來無一物，何處惹塵埃？

書此偈已，徒眾總驚，無不嗟訝，各相謂言：「奇哉！不得以貌取人。何得多時，使他肉身菩薩？」

【B12】

祖見眾人驚怪，恐人損害，遂將鞋擦了偈曰：亦未見性。

眾人疑息。

◎次日，祖潛至碓坊，見能腰石舂米，語曰：「求道之人，為法忘軀，當如是乎！」乃問曰：「米熟也未？」

惠能曰：「米熟久矣，猶欠篩在。」

【B13】

祖以杖擊碓三下而去。惠能即會祖意，三鼓入室。

祖遂徵其初悟「應無所住而生其心」。

惠能言下大徹，遂啟祖言：一切萬法不離自性。

何期自性本自清淨，何期自性本不生滅，何期自性本自具足，

何期自性本無動搖，何期自性能生萬法。

祖知悟本性，謂能曰：「不識本心，學法無益；若識本心，見自本性，即名丈夫、天人師、佛。」

三更受法，人盡不知。

便傳頓教及衣鉢云：「汝為第六代祖，善自護念，廣度有情，流布將來，無令斷絕。」

◎聽吾偈曰：

有情來下種，因地果還生，無情既無種，無性亦無生。

【B14】

祖復曰：「昔達磨大師初來此土，人未之信，故傳此衣以為信證，代代相承。法則以心傳心，皆令自悟自證。自古佛佛惟傳本體，師師密付本心。衣為爭端，止汝勿傳。若傳此衣，命如懸絲。汝須速去，恐人害汝。」

◎惠能啟曰：「向甚處去？」

祖云：「逢懷則止，遇會則藏。」

三更領得衣鉢云：「能本是嶺南人，素不知此山路，如何得出江口？」

祖言：「汝不須憂，吾自送汝。」

祖送至九江驛邊。

◎祖令上船。惠能隨即把櫂。

祖云：「合是吾渡汝。」

惠能云：「迷時師度，悟了自度。度名雖一，用處不同。惠能生在邊方，語音不正，蒙師付法，今已得悟，只合自性自度。」

祖云：「如是如是。以後佛法由汝大行。汝去三年，吾方逝世。汝今好去，努力向南。不宜速說，佛法難起。」

【B15】

惠能辭違祖已，發足南行。兩月中間，至大庾嶺。

祖歸數日不上堂。眾疑詣問曰：和尚少病少惱否？

曰：病即無，衣法已南矣。

問：誰人傳受？

曰：能者得之。眾乃知焉。

逐後數百人來，欲奪衣鉢。

一僧俗姓陳，名惠明，先是四品將軍，性行麤慥，極意參尋，為眾人先，趁及惠能。

惠能擲下衣鉢於石上云：此衣表信，可力爭耶？

惠能隱草中。

惠明至，提掇不動，乃喚云：「行者！行者！我為法來，不為衣來。」

惠能遂出，坐盤石上。

惠明作禮云：「望行者為我說法。」

◎惠能云：「汝既為法而來，可屏息諸緣，勿生一念。吾為汝說。」

{良久}，惠能曰：「不思善，不思惡，正與麼時，那箇是明上座本來面目？」

惠明言下大悟。

◎復問云：「上來密語密意外，更有密意否？」

惠能云：與汝說者，即非密也。汝若返照，密在汝邊。」

明曰：「惠明雖在黃梅，實未省自己面目。今蒙指示，如人飲水，冷暖自知，今行者即惠明師也。」

惠能曰：「汝若如是，吾與汝同師黃梅，善自護持。」

明又問：「惠明今後向甚處去？」

惠能曰：「逢袁則止，遇蒙則居。」

明禮辭，回至嶺下，謂趨眾曰：「向陡崔嵬，竟無蹤跡，當別道尋之。」

趨眾咸以為然。惠明後改道明，避吾上字。

◎惠能後至曹溪，又被惡人尋逐。乃於四會，避難獵人隊中，凡經一十五載。

時與獵人隨宜說法。獵人常令守網。每見生命，盡放之。

每至飯時，以菜寄煮肉鍋。或問，則對曰：「但喫肉邊菜。」

一日思惟：時當弘法，不可終遯。遂出至廣州法性寺。

值印宗師講《涅槃經》。

因二僧論風旛義。

一曰：風動。一曰：旛動。議論不已。

惠能進曰：「不是風動，不是旛動，仁者心動。」

一眾駭然。

印宗延至上席，徵詰奧義。見惠能言簡理當，不由文字。

宗云：「行者定非常人，久聞黃梅衣法南來，莫是行者否？」

惠能曰：「不敢。」

宗於是作禮，告請傳來衣鉢，出示大眾。

宗復問曰：「黃梅付囑，如何指授？」

惠能曰：「指授即無，惟論見性，不論禪定解脫。」

宗曰：「何不論禪定解脫？」

能曰：「為是二法，不是佛法，佛法是不二之法。」

宗又問：「如何是佛法不二之法？」

惠能曰：「法師講《涅槃經》，明佛性是佛法不二之法，如高貴德王菩薩白佛言：犯四重禁，作五逆罪及一闍提等，當斷善根佛性否？佛言：善根有二，一者常，二者無常。佛性非常非無常，是故不斷，名為不二。一者善，二者不善。佛性非善非不善，是名不二。蘊之與界，凡夫見二，智者了達其性無二。無二之性，即是佛性。」

印宗聞說，歡喜合掌言：「某甲講經，猶如瓦礫。仁者論義，猶如真金。」於是為惠能剃髮，願事為師。惠能遂於菩提樹下，開東山法門。

【B16】

惠能於東山得法，辛苦受盡，命似懸絲。今日得與史君、官僚、僧尼、道俗同此一會，莫非累劫之緣。亦是過去生中，供養諸佛，同種善根，方始得聞如上頓教得法之因。

教是先聖所傳，不是惠能自智。

【B17】

願聞先聖教者，各令淨心，聞了各自除疑，如先代聖人無別。

【第三摩訶般若品】

【C1】（德異本編號）

師復告眾曰：善知識！菩提般若之智，世人本自有之。只緣心迷，不能自悟，須假大善知識示導見性。當知愚人、智人，佛性本無差別，只緣迷悟不同，所以有愚、有智。

【C2】

吾今為說摩訶般若波羅蜜法，使汝等各得智慧。

志心諦聽！吾為汝說。

◎善知識！世人終日口念般若，不識自性般若。

猶如說食不飽，口但說空，萬劫不得見性，終無有益。

善知識！摩訶般若波羅蜜，是梵語，此言大智慧到彼岸。

此須心行，不在口念，口念心不行，如幻如化，如露如電。

口念心行，則心口相應。本性是佛，離性無別佛。

【C3】

何名摩訶？摩訶是大。心量廣大，猶如虛空。

◎無有邊畔，亦無方圓大小，亦非青黃赤白，亦無上下長短，亦無嗔無喜，無是無非，無善無惡，無有頭尾。諸佛刹土，盡同虛空。世人妙性本空，無有一法可得。自性真空，亦復如是。

善知識！莫聞吾說空便即著空。

第一莫著空。若空心靜坐，即著無記空。

善知識！世界虛空，能含萬物色像。日月星宿，山河大地，泉源溪澗，草木叢林，惡人善人，惡法善法，天堂地獄，一切大海，須彌諸山，總在空中。世人性空，亦復如是。

善知識！自性能含萬法，是大。萬法在諸人性中。

若見一切人，惡之與善，盡皆不取不捨，亦不染著，心如虛空，名之為大，故曰摩訶。

善知識！迷人口說，智者心行。又有迷人，空心靜坐，百無所思，自稱為大。此一輩人，不可與語，為邪見故。

◎善知識！心量廣大，徧周法界。用即了了分明，應用便知一切。一切即一，一即一切，去來自由，心體無滯，即是般若。

善知識！一切般若智，皆從自性而生，不從外人，莫錯用意，名為真性自用。一真一切真。心量大事，不行小道。口雖終日說空，心中不修此行，恰似凡人自稱國王，終不可得，非吾弟子。

【C4】

善知識！何名般若？

般若者，唐言智慧也。

一切處所，一切時中，念念不愚，常行智慧，即是般若行。

一念愚即般若絕。一念智即般若生。

世人愚迷，不見般若。口說般若，心中常愚。常自言我修般若，念念說空，不識真空。

般若無形相，智慧心即是。若作如是解，即名般若智。

【C5】

何名波羅蜜？此是西竺語，唐言到彼岸。

解義離生滅，著境生滅起，如水有波浪，即名為此岸。

離境無生滅，如水常通流，即名為彼岸，故號波羅蜜。

【C6】

善知識！迷人口念，當念之時，惟妄惟非。念念若行，是名真性。悟此法者，是般若法。修此行者，是般若行。不修即凡，一念修行，自身等佛。

善知識！凡夫即佛，煩惱即菩提。
前念迷即凡夫，後念悟即佛。
前念著境，即煩惱；後念離境，即菩提。

【C7】

善知識！摩訶般若波羅蜜，最尊、最上、最第一、無住、無往亦無來，三世諸佛從中出。
當用大智慧，打破五蘊煩惱塵勞。
如此修行，定成佛道，變三毒為戒定慧。

【C8】

善知識！我此法門，從般若生八萬四千智慧，何以故？
為世人有八萬四千塵勞。若無塵勞，智慧常現，不離自性。
悟此法者，即是無念、無憶、無著，不起誑妄，用自真如性，以智慧觀照，於一切法不取、不捨，即是見性成佛道。

【C9】

善知識！若欲入甚深法界及般若三昧者，須修般若行，持誦《金剛般若經》，即得見性。當知此功德無量無邊，經中分明讚歎，莫能具說。
此法門是最上乘，為大智人說，為上根人說。
小根小智人聞，心生不信。何以故？
譬如大龍，下雨於閻浮提，城邑、聚落，悉皆漂流，如漂棗葉；
若雨大海，不增不減。

【C10】

若大乘人，若最上乘人，聞說《金剛經》，心開悟解。
故知本性自有般若之智，自用智慧常觀照故，不假文字。
譬如雨水，不從天有，元是龍能興致，令一切眾生、一切草木、有情無情，悉皆蒙潤，百川眾流，卻入大海，合為一體。
眾生本性般若之智，亦復如是。

【C11】

善知識！小根之人，聞此頓教，猶如草木根性小者，若被大雨，悉皆自倒，不能增長。
小根之人，亦復如是。元有般若之智，與大智人更無差別，因何聞法不自開悟？緣邪見障重、煩惱根深。
猶如大雲覆蓋於日，不得風吹，日光不現。
般若之智，亦無大小，為一切眾生自心迷悟不同。
迷心外見，修行覓佛，未悟自性，即是小根。

若{聞}頓教，不執外修，但於自心，常起正見，煩惱塵勞常不能染，即是見性。

善知識！內外不住，去來自由，能除執心，通達無礙，能修此行，與《般若經》本無差別。

【C12】

善知識！一切修多羅及諸文字，皆因人置，因智慧性，方能建立。若無世人，一切萬法本自不有，故知萬法本自人興，一切經書因人說有。緣其中，有愚有智，愚為小人，智為大人。愚者問於智人，智者與愚人說法，愚人忽{然}悟解心開，即與智人無別。

善知識！不悟，即佛是眾生；一念悟時，眾生是佛。

故知萬法盡在自心，何不從自心中頓見真如本性？

【C13】

《菩薩戒經》云：「{本源}自性清淨。」若識自心見性皆成佛道。《淨名經》云：「即時豁然，還得本心。」

【C14】

善知識！我於忍和尚處一聞，言下便悟，頓見真如本性。

是以將此教法流行，令學道者頓悟菩提，各自觀心，自見本性。

【C15】

若自不悟，須覓大善知識解最上乘法者，直示正路。是善知識有大因緣，所謂化導令得見性。一切善法，因善知識能發起故。

三世諸佛、十二部經，在人性中本自具有，不能自悟，須求善知識指示方見。若自悟者，不假外求。若一向執，謂須要他善知識方得解脫者，無有是處。何以故？自心內有知識自悟。

若起邪迷，妄念顛倒，外善知識雖有教授，救不可得。若起正真般若觀照，一剎那間妄念俱滅，識自本性，一悟即至佛地。

善知識！智慧觀照，內外明徹，識自本心。若識本心，即本解脫；若得解脫，即是般若三昧。般若三昧，即是無念。

【C16】

何名無念？若見一切法，心不染著，是為無念，用即徧一切處，亦不著一切處。但淨本心，使六識出六門，於六塵中無染無雜，來去自由，通用無滯，即是般若三昧，自在解脫，名無念行。

若百{物}不思，常令念絕，即是法縛，即名邊見。

善知識！悟無念法者，萬法盡通。悟無念法者，見諸佛境界。悟無念法者，至佛地位。

【C17】

善知識！後代得吾法者，將此頓教法門，於同見同行，發願受持，如事佛故終身而不退者，定入聖位。然須傳授，從上以來，默傳分付，不得匿其正法。

【C18】

若不同見同行，在別法中，不得傳付。損彼前人，究竟無益。恐愚人不解，謗此法門，百劫、千生斷佛種性。

【D1】

善知識！吾有一《無相頌》，各須誦取。
在家出家，但依此修。
若不自修，惟記吾言，亦無有益。聽吾頌曰：

說通及心通，如日處虛空，唯傳見性法，出世破邪宗。
法即無頓漸，迷悟有遲疾，只此見性門，愚人不可悉。
說即雖萬般，合理還歸一，煩惱暗宅中，常須生慧日。
邪來煩惱至，正來煩惱除，邪正俱不用，清淨至無餘。
菩提本自性，起心即是妄，淨心在妄中，但正無三障。
世人若修道，一切盡不妨，常自見己過，與道即相當。
色類自有道，各不相妨惱，離道別覓道，終身不見道。
波波度一生，到頭還自懊，欲得見真道，行正即是道。
自若無道心，闇行不見道，若真修道人，不見世間過。
若見他人非，自非卻是左，他非我不非，我非自有過。
但自卻非心，打除煩惱破，憎愛不關心，長伸兩腳臥。
欲擬化他人，自須有方便，勿令彼有疑，即是自性現。
佛法在世間，不離世間覺，離世覓菩提，恰如求兔角。
正見名出世，邪見是世間，邪正盡打卻，菩提性宛然。
此頌是頓教，亦名大法船，迷聞經累劫，悟則剎那間。

【D2】

祖復曰：今於大梵寺說此頓教，普願法界眾生言下見性成佛。

【D3】

時韋史君與官僚、道俗闡師所說，無不省悟。
一時作禮，皆歎：善哉！何期嶺南有佛出世。

【第四功德淨土品】

【E1】（德異本編號）

次日，韋刺史為師設大會齋。

齋訖，刺史請祖升座，同官僚、士庶，肅容再拜，問曰：「弟子聞和尚說法，實不可思議。今有少疑，願大慈悲，特為解說。」

祖曰：「有疑即問，吾當為說。」

韋公曰：「和尚所說可不是達磨大師宗旨乎？」

祖曰：「是。」

【E2】

公曰：「弟子聞達磨初化梁武帝。帝問云：朕一生造寺、度僧、布施、設齋有何功德？達磨言：實無功德。弟子未達此理，願和尚為說。」

祖曰：「實無功德，勿疑先聖之言。帝心執著，不知正法。

造寺、度僧、布施、設齋，名為求福，不可將福便為功德。

功德在法身中，不在修福。」

祖又曰：「見性是功，平等是德。念念無滯，常見本性真實妙用，名為功德。內心謙下是功，外行於禮是德。自性建立萬法是功，心體離念是德。不離自性是功，應用無染是德。若覓功德法身，但依此作，是真功德。若修功德之人，心即不輕，常行普敬。

心常輕人，吾我不斷，即自無功。自性虛妄不實，即自無德，為吾我自大常輕一切故。

善知識！念念無間是功，心行平直是德。自修性是功，自修身是德。

善知識！功德須自性內見，不是布施、供養之所求也。是以福德與功德別。武帝不識真理，非我祖師有過。」

【E3】

刺史又問曰：「弟子常見僧俗，念阿彌陀佛，願生西方，請和尚說，得生彼否？願為破疑。」

【E4】

祖言：「史君善聽！惠能與說。釋迦世尊在王舍城說《觀經》，有云阿彌陀佛去此不遠，經文分明。若論相說，十萬億剎，即人身中十惡等障。說遠為其下根，說近為其上智。

人有兩種，法無兩般。迷悟有殊，見有遲疾。迷人念佛求生於彼，悟人自淨其心。所以佛言：隨其心淨即佛土淨。

史君！東方人但心淨即無罪，雖西方人心不淨亦有愆。

東方人念佛求生西方；且西方人念佛更求生何國？
凡愚不了自性，不識身中淨土，願東、願西。
悟人在處一般，所以佛言：隨所住處恆安樂。
史君！心地但無不善，西方去此不遙。若懷不善之心，念佛往生難到。
今勸善知識，能除十惡等障乃過十萬億剎。
念念見性，常行平直，到如彈指，便覩彌陀。
史君！但行十善，何須更願往生？不斷十惡之心，何佛即來迎請？若
悟無生頓法，見西方只在剎那；不悟，念佛求生，路遙如何得達？
惠能與諸人移西方於剎那間，目前便見，各願見否？」

【E5】

眾皆頂禮云：「若此處見，何須更願往生？願和尚慈悲，便現西方，
普令得見。」

【E6】

祖言：「大眾！世人自色身是城，眼、耳、鼻、舌是門，外有諸門，
內有意門。心是地，性是王。王居心地上。
性在王在，性去王無。性在身心存，性去身心壞。
佛向性中作，莫向身外求。自性迷，即是眾生；自性覺，即是佛。
慈悲即是觀音，喜捨名為勢至，能淨即釋迦，平直即彌陀。
人我是須彌，貪慾是海水，煩惱是波浪，毒害是惡龍，虛妄是鬼神，
塵勞是魚鱉，貪嗔是地獄，愚癡是畜生。
善知識！常行十善，天堂便至。除人我，須彌倒。去貪慾，海水竭。
煩惱無，波浪滅。毒害除，魚龍絕。
自心地上，覺性如來放大光明，外照六門清淨，能破六欲諸天；自性
內照，三毒即除，地獄等罪一時消滅，內外明徹，不異西方。不作此
修，如何到得？」
大眾聞說，了然見性，悉皆禮拜，俱歎善哉！
唱言：「普願法界眾生，聞者一時悟解。」

【E7】

祖言：「善知識！若欲修行，在家亦得，不但在寺。
在家能行，如東方人心善。
在寺不修，如西方人心惡。
但能心常清淨，即是自性西方。」

【E8】

韋公又問：「在家如何修行？願為教授。」

【E9】

師言：「吾與大眾說《無相頌》。但依此修，常與吾同處無別。若不依此修，剃髮出家，於道何益？」

◎頌曰：

心平何勞持戒？行直何用修禪？

恩則孝養父母，義則上下相憐；讓則尊卑和睦，忍則眾惡無喧。
若能鑽木出火，淤泥定生紅蓮；苦口的是良藥，逆耳必是忠言。
改過必生智慧，護短心內非賢；日用常行饒益，成道非由施錢。
菩提只向心覓，何勞向外求玄？聽說依此修行，西方只在目前。

【F1】

祖復曰：善知識！總須依偈修行，見取自性，直成佛道。
時不相待。眾人且散，吾歸曹溪。眾若有疑，卻來相問。

【F2】

時刺史、官僚，在會善男信女，各得開悟，信受奉行。

【第五定慧一體品】

【G1】（德異本編號）

祖示眾云：善知識！我此法門以定慧為本。

大眾勿迷，言定慧別。定慧一體，本不是二；定是慧體，慧是定用。

即慧之時定在慧，即定之時慧在定。

若識此義，即是定慧等學。

諸學道人，莫言：「先定發慧，{先慧發定}，慧定各別。」

作此見者，法有二相：口說善語，心中不善，空有定慧，定慧不等。

若心口俱善，內外一如，定慧即等。

自悟修行，不在於諍。若諍先後，即同迷人。

不斷勝負，卻增我法，不離四相。

【G4】（表示此段在德異本是在 G3 之後）

善知識！定、慧猶如何等？

猶如燈、光：有燈即光，無燈即暗。

燈是光之體，光是燈之用，名雖有二，體本同一。

此定、慧法，亦復如是。

【G2】

祖示眾云：善知識！一行三昧者，於一切處，行、住、坐、臥常行一直心是也。如《淨名經》云：「直心是道場，直心是淨土。」

莫心行諂曲，口但說直、口說一行三昧，不行直心。

但行直心，於一切法勿有執著。

【G3】

迷人著法相，執一行三昧，直言：「常坐不動，{除}妄不起心，即是一行三昧。」作此解者，即同無情，卻是障道因緣。

祖示眾云：善知識！道須通流，何以卻滯？

心不住法，道即通流；心若住法，名為自縛。

若言常坐不動是，只如舍利弗宴坐林中，卻被維摩詰訶。

善知識！又有人教坐，看心 {看淨}，不動不起，從此置功。

迷人不解，便執成顛，如此者眾，如是相教，故知大錯。

祖示眾云：善知識！本來正教無有頓漸，人性自有利鈍。

迷人漸修，悟人頓契。所以立頓漸之假名。自識本心，自見本性，即無差別。

【G5】

善知識！我此法門，從上以來，先立：

無念為宗，無相為體，無住為本。

【G6】

無相者，相而離相。

【G7】

無念者，念而無念。

【G8】

無住者，人之本性。於世間善惡、好醜，乃至冤之與親，言語觸刺、欺爭之時，並將為空，不思酬害。

念念之中，不思前境。{前念}、今念、後念，念念相續不斷，{於一切法上無住。一念若住，念念即住}，名為繫縛。

於諸法上念念不住，即無縛也。

此是以無住為本。

【G9】

善知識！外離一切相，名為無相。

能離於相，即法體清淨。此是以無相為體。

【G10】

善知識！於諸境上心不染，曰無念。
於自念上常離諸境，不於境上生心。
若執百物不思，念盡除卻，一念絕即死，別處受生，是為大錯。
學道者思之！若不識法意，自錯猶可，更 { 誤 } 他人，自迷不見，又
謗佛經。所以立無念為宗。
善知識！云何立無念為宗？
只緣口說見性，迷人於境上有念，念上便起邪見，一切塵勞妄想從此
而生。自性本無一法可得。若有所得，妄說禍福，即是塵勞邪見。
故此法門立無念為宗。
善知識！無者無何事？念者念何物？
無者，無二相，無諸塵勞之心。
念者，念真如本性。真如即是念之體。念即是真如之用。
真如自性起念，非眼、耳、鼻、舌能念。
真如有性，所以起念。真如若無，眼、耳、色、聲當時即壞。
善知識！真如自性起念，六根雖有見聞覺知，不染萬境而真性常自
在。
故經云：「能善分別諸法相，於第一義而不動。」

【第六教授坐禪品】

【G15】（德異本編號）（表示此段在德異本是在 G14 之後）
祖示眾云：此門坐禪，元不 { 看心 }，亦不 { 看淨 }，亦不是不動。
若言 { 看心 }，心元是妄，知心如幻，故無所著也。
若言 { 看淨 }，人性本淨，由妄念故，蓋覆真如，但無妄想，性自清
淨。起心 { 看淨 }，卻生淨妄，妄無處所，{ 看 } 者是妄。
淨無形相，卻立淨相，言是工夫，作此見者，障自本性，卻被淨縛。
善知識！若修不動者，但見一切人時，不見人之是非、善惡、過患，
即自性不動。
善知識！迷人身雖不動，開口便說他人是非、長短、好惡，與道違背。
若 { 看心 } { 看淨 }，即障道也。

【G11】

祖示眾云：善知識！何名坐禪？此法門中無障無礙，外於一切善惡境
界，心念不起，名為坐；內見自性不動，名為禪。

【G12】

善知識！何名禪定？外離相為禪，內不亂為定。
外若著相，內心即亂。外若離相，心即不亂，本性自淨、自定。
只為見境、思境即亂。若見諸境心不亂者，是真定也。
善知識！外離相即禪，內不亂即定。
外禪內定，是為禪定。

【G13】

《淨名經》云：「即時豁然，還得本心」，《菩薩戒經》云：「{本源自性}清淨。」

【G14】

善知識！於念念中自見本性清淨，自修自行，自成佛道。

【第七傳戒歸依品】

【H1】（德異本編號）

時祖師見廣韶洎四方士庶駢集山中聽法，於是陞座告眾曰：
來！諸善知識！此事須從自性中起，於一切時念念自淨其心，自修自行，見自己法身，見自心佛，自度自戒，始得本不假到此。既從遠來，一會于此，皆共有緣，今可各各胡跪。

◎先為傳自性五分法身香，次授無相懺悔。眾胡跪。

師曰：

- 一、戒香，即自心中無非、無惡、無嫉妬、無貪嗔、無劫害，名戒香。
- 二、定香，即觀諸善惡境相，自心不亂，名定香。
- 三、慧香，自心無礙，常以智慧觀照自性，不造諸惡。雖修眾善，心不執著；敬上念下，矜恤孤貧，名慧香。
- 四、解脫香，即自心無所攀緣，不思善，不思惡，自在無礙，名解脫香。
- 五、解脫知見香，自心既無所攀緣善惡，不可沈空守寂，即須廣學多聞，識自本心，達諸佛理，{言滿天下無口過，行滿天下無怨惡}，和光接物，無我無人，直至菩提真性不易，名解脫知見香。

善知識！此香各自內薰，莫向外覓。

【H2】

今與汝等授無相懺悔，滅三世罪，令得三業清淨。

善知識！各隨我語，一時道：

弟子等，從前念、今念及後念，念念不被愚迷染。

從前所有惡業、愚迷等罪，悉皆懺悔。願一時消滅，永不復起。
弟子等，從前念、今念及後念，念念不被僞誑染。

從前所作惡業、僞誑等罪，悉皆懺悔。願一時消滅，永不復起。
弟子等，從前念、今念及後念，念念不被嫉妬染。

從前所有惡業、嫉妬等罪，悉皆懺悔。願一時消滅，永不復起。

【H3】

善知識！已上是為無相懺悔。

云何名懺？云何名悔？

懺者，懺其前愆，從前所有惡業、愚迷、僞誑、嫉妬等罪，悉皆盡懺，永不復起，是名為懺。

悔者，悔其後過，從今以後，所有惡業、愚迷、僞誑、嫉妬等罪，今已覺悟，悉皆永斷，更不復作，是名為悔。

故稱懺悔。

凡夫愚迷，只知懺其前愆，不知悔其後過。以不悔故，前愆不滅，後過又生。前愆既不滅，後過復又生，何名懺悔！

【I1】

善知識！既懺悔已，與善知識發四弘誓願。各須用心正聽：

自心眾生無邊誓願度，自心煩惱無邊誓願斷；

自性法門無盡誓願學，自性無上佛道誓願成。

【I2】

善知識！大家豈不道，眾生無邊誓願度，恁麼道，且不是惠能度。

善知識！心中眾生，所以邪迷心、誑妄心、不善心、嫉妬心、惡毒心，如是等心，盡是眾生。各須自性自度，是名真度。

何名自性自度？

即自心中，邪見、煩惱、愚癡眾生，將正見度。

既有正見，使般若智打破愚癡、迷妄眾生，各各自度。

邪來正度，迷來悟度，愚來智度，惡來善度。

如是度者，名為真度。

【I3】

又煩惱無邊誓願斷，將自性般若智，除卻虛妄思想心是也。

【I4】

又法門無盡誓願學，須自見性，常行正法，是名真學。

【I5】

又無上佛道誓願成，既常能下心，行於真正，離迷離覺，常生般若，

除真除妄，即見佛性，即言下佛道成，常念修行，是願力法。

【J1】

善知識！今發四弘願了，更與善知識授無相三歸依戒：

善知識！歸依覺，兩足尊。歸依正，離欲尊。歸依淨，眾中尊。

從今日去，稱覺為師，更不歸依邪魔外道。

以自性三寶常自證明！

【J2】

勸善知識歸依自性三寶。

佛者，覺也。法者，正也。僧者，淨也。

【J3】

自心歸依覺，邪迷不生，少欲知足，能離財色，名兩足尊。

【J4】

自心歸依正，念念無邪見。以無邪見故，即無人我、貢高、貪愛、執著，名離欲尊。

【J5】

自心歸依淨，一切塵勞、愛欲境界，自性皆不染著，名眾中尊。

【J6】

若修此行，是自歸依。凡夫不會，從日至夜，受三歸戒。若言歸依佛，佛在何處？若不見佛，憑何所歸？言卻成妄。

善知識！各自觀察，莫錯用心。

經文分明言自歸依佛，不言歸依他佛。

自佛不歸，無所依處。

今既自悟，各須歸依自心三寶。

內調心性，外敬他人，是自歸依也。

【K1】

善知識！既歸依自三寶竟，各各志心，吾與說一體三身自性佛，令汝等見三身了然，自悟自性，總隨我道：

於自色身，歸依清淨法身佛。

於自色身，歸依圓滿報身佛。

於自色身，歸依千百億化身佛。

【K2】

善知識！色身是舍宅，不可言歸，向者三身佛在自性中，世人總有，為自心迷，不見內性，外覓三身如來，不見自身中有三身佛。

汝等聽說，令汝等於自身中，見自性有三身佛。

此三身佛從自性生，不從外得。

【K3】

何名清淨法身佛？

世人性本清淨，萬法從自性生：思量一切惡事，即生惡行；思量一切善事，即生善行，如是諸法，在自性中。如天常清，日月常明，為浮雲蓋覆，上明下暗，忽遇風吹雲散，上下俱明，萬象皆現。世人性常浮游，如彼天雲。

善知識！智如日，慧如月，智慧常明。於外著境，被妄念浮雲蓋覆自性，不得明朗。若遇善知識聞真正法，自除迷妄，內外明徹，於自性中萬法皆現。見性之人，亦復如是。此名清淨法身佛。

善知識！自心歸依自性，是歸依真佛。

自歸依者，除卻自性中不善心、嫉妬心、諂曲心、吾我心、誑妄心、輕人心、慢他心、邪見心、貢高心及一切時中不善之行，常自見己過，不說他人好惡，是自歸依。

常須下心，普行恭敬，即是見性通達，更無滯礙，是自歸依。

【K5】

何名圓滿報身？

譬如一燈能除千年暗，一智能滅萬年愚。

莫思向前，已過不可得。常思於後，念念圓明，自見本性。

善惡雖殊，本性無二。無二之性，名為實性。於是性中，不染善惡，此名圓滿報身佛。

自性起一念惡，滅萬劫善因。

自性起一念善，得恆河沙惡盡，直至無上菩提，念念自見，不失本念，名為報身。

【K4】

何名千百億化身？

若不思，萬法性本如空。一念思量，名為變化：思量惡事化為地獄，思量善事化為天堂，毒害化為龍蛇，慈悲化為菩薩，智慧化為上界，愚癡化為下方。

自性變化甚多，迷人不能省覺，念念起惡，常行惡道。

迴一念善，智慧即生，此名自性化身佛。

【K6】

善知識！法身本具。

念念自性自見，即是報身佛。

從報身思量即是化身佛。
自悟自修自性功德，是真歸依。
皮肉是色身，色身是舍宅，不言歸依也。
但悟自性三身，即識自性佛。

【L1】

吾有一《無相頌》，若能誦持，言下令汝積劫迷罪一時消滅。
頌曰：

迷人修福不修道，只言修福便是道，
布施供養福無邊，心中三惡元來造。
擬將修福欲滅罪，後世得福罪還在，
但向心中除罪緣，各自性中真懺悔。
忽悟大乘真懺悔，除邪行正即無罪，
學道常於自性觀，即與諸佛同一類。
吾祖惟傳此頓法，普願見性同一體，
若欲當來覓法身，離諸法相心中洗。
努力自見莫悠悠，後念忽絕一世休，
若悟大乘得見性，虔敬合掌至心求。

【L2】

祖言：善知識！總須誦取。依此修行，言下見性，雖去吾千里，如常在吾邊。於此言下不悟，即對面千里，何勤遠來？珍重好去！

【L3】

一眾聞法，靡不開悟，歡喜奉行。

六祖大師法寶壇經終

契嵩短本的學術修正

林崇安，2021.03

壇經〈契嵩本〉有長本和短本二種。契嵩先編出長本《六祖大師法寶壇經》，其前半即是《六祖法寶記》。過幾年將《六祖法寶記》做學術上的修正，編出短本的《六祖大師法寶壇經》。以下舉出〈契嵩短本〉中幾處重要的修正。

[法寶記]=《六祖大師法寶壇經》〈正統德異本〉的前半部。

[契嵩短本]=《明版洪武南藏》的短本《六祖大師法寶壇經》。

(1) 修正情景

[法寶記]

祖以杖擊碓三下而去。能即會祖意，三鼓入室。祖以袈裟遮圍，不令人見，為說《金剛經》，至應無所住而生其心。能言下大悟一切萬法不離自性。遂啟祖言：「何期自性本自清淨……。」

[契嵩短本]

祖以杖擊碓三下而去。惠能即會祖意，三鼓入室。祖遂徵其初悟「應無所住而生其心」。惠能言下大徹，遂啟祖言：「一切萬法不離自性。何期自性本自清淨……。」

說明：[法寶記]中，「祖以袈裟遮圍，不令人見」，這種情景在佛陀的教導中屬於太特殊，佛陀教導義理時都是公開；教導禪定、神通時，只要弟子的根器夠，也都是公開，所以契嵩於[短本]中對「以袈裟遮圍，不令人見」有所修正。

(2) 修正情景

[法寶記]

祖令惠能上船。五祖把艫自搖。惠能言：「請和尚坐，弟子合搖艫。」五祖云：「合是吾渡汝。」能云：「迷時師度，悟了自度。……」

[契嵩短本]

祖令上船。惠能隨即把舫。祖云：「合是吾渡汝。」惠能云：「迷時師度，悟了自度。…」

說明：[法寶記]中，由於六祖惠能體小，又不知方位，所以五祖把舫自搖過河，但是似不符禮儀，故契嵩於[短本]特別改為「惠能隨即把舫」，以符禮儀，因為當時契嵩是大力倡導佛儒一貫的。為何原先會是五祖弘忍把舫自搖呢？依據《曆代法寶記》所說：「唐朝第五祖弘忍禪師。俗姓周。黃梅人也。七歲事信大師。…常勤作務。以禮下人。晝則混迹驅給。夜便坐攝至曉。未常懈倦。三十年不離信大師左右。身長八尺。容貌與常人絕殊。」可知五祖身材高大有力，而惠能體小，又不知方位，所以五祖把舫自搖過河是合理的。

(3) 修正引證

[法寶記]

師言：「使君善聽！惠能與說。世尊在舍衛城中，說西方引化，經文分明，去此不遠。若論相說，里數有十萬八千，即身中十惡八邪，便是說遠。…」

[契嵩短本]

祖言：「史君善聽！惠能與說。釋迦世尊在王舍城說《觀經》，有云阿彌陀佛去此不遠，經文分明。若論相說，十萬億剎，即人身中十惡等障。…」

說明：[法寶記]中，經文分明，去此不遠。由於「去此不遠」一詞是出自《觀無量壽佛經》而不是《阿彌陀經》，場地是在王舍城，所以契嵩於[短本]特別將之修正。

(4) 段落移動

[法寶記]

【G1】師示眾云：善知識！我此法門以定慧為本。大眾勿迷，言定慧別。定慧一體，不是二；定是慧體，慧是定用。即慧之時定在慧，即定之時慧在定。若識此義，即是定慧等學…。

【G2】善知識！一行三昧者，……。

【G3】迷人著法相，執一行三昧，……。

【G4】善知識！定、慧猶如何等？猶如燈、光：有燈即光，無燈即暗。燈是光之體，光是燈之用，名雖有二，體本同一。此定、慧法，亦復如是。

[契嵩短本]

【G1】祖示眾云：善知識！我此法門以定慧為本。大眾勿迷，言定慧別。定慧一體，本不是二；定是慧體，慧是定用。即慧之時定在慧，即定之時慧在定。若識此義，即是定慧等學……。

【G4】善知識！定、慧猶如何等？猶如燈、光：有燈即光，無燈即暗。燈是光之體，光是燈之用，名雖有二，體本同一。此定、慧法，亦復如是。

【G2】祖示眾云：善知識！一行三昧者，……。

【G3】迷人著法相，執一行三昧，……。

說明：[法寶記]中，【G1】與【G4】中間，插入一行三昧二段。[契嵩短本]將【G4】移前接到【G1】，如此內容較為一致。

(5) 段落移動

[法寶記]

善知識！本來正教無有頓漸，人性自有利鈍。迷人漸契，悟人頓修。自識本心，自見本性，即無差別。所以立頓漸之假名。

[契嵩短本]

善知識！本來正教無有頓漸，人性自有利鈍。迷人漸修，悟人頓契。所以立頓漸之假名。自識本心，自見本性，即無差別。

說明：短本調整後，語意較為順暢。

(6) 段落移動

[法寶記]

【第六教授坐禪品】

【G11】師示眾云：善知識！何名坐禪？……。

【G12】善知識！何名禪定？……。

【G13】《淨名經》云：「即時豁然，還得本心」，《菩薩戒經》云：「{本源自性}清淨。」

【G14】善知識！於念念中自見本性清淨，自修自行，自成佛道。

【G15】然此門坐禪，元不{看}心，亦不{看}淨，亦不是不動。……。

[契嵩短本]

【G15】然此門坐禪，元不{看}心，亦不{看}淨，亦不是不動。……。

【G11】師示眾云：善知識！何名坐禪？……。

【G12】善知識！何名禪定？……。

【G13】《淨名經》云：「即時豁然，還得本心」，《菩薩戒經》云：「{本源自性}清淨。」

【G14】善知識！於念念中自見本性清淨，自修自行，自成佛道。

說明：此處契嵩將內容相關的段落【G15】和【G11】移在一起。

(7) 段落移動

[法寶記]

於自色身，歸依清淨法身佛。

於自色身，歸依千百億化身佛。

於自色身，歸依圓滿報身佛。

[契嵩短本]

於自色身，歸依清淨法身佛。

於自色身，歸依圓滿報身佛。

於自色身，歸依千百億化身佛。

說明：[法寶記]中，三身次第是法身、化身和報身，不符一般大乘經的法報化三身的次第，所以契嵩於[短本]特別將之修正為法報化三身的次第，後面經文有【K4】何名千百億化身？【K5】何名圓滿報身？這二大段落也同樣將次第調整。

(8) 段落移動

[法寶記]

善知識！從法身思量，即是化身佛。

念念自性自見，即是報身佛。

[契嵩短本]

善知識！法身本具。

念念自性自見，即是報身佛。

從報身思量，即是化身佛。

說明：契嵩於[短本]中，將[法寶記]的「從法身思量即是化身佛」分出「法身本具」和「從報身思量即是化身佛」，這是依據大乘經典，區分法報化三身的次第。

關於編校者

林崇安教授，台灣台中縣人，1947年生。美國萊斯大學理學博士（1974）。中央大學專任教授（1974-2000），曾於法光、圓光、中華佛研所兼授佛學課程。內觀教育禪林創辦人。
佛學專長：內觀禪修、佛教邏輯、佛教宗派思想。

◎歷年佛學與禪修編著以 PDF 檔和影音頻道分享：

（1）林崇安教授文集 <http://www.ss.ncu.edu.tw/~calin/>

本網頁收集【佛法教材】有 120 冊，【佛法論文集】有 260 篇，【六祖壇經專集】有壇經原典和論文 50 篇。【科學哲學】有 23 篇文章。
【內觀雜誌】共 120 期電子檔。

（2）林崇安教授 YouTube 影音頻道

1. 「佛法教材研習」共 63 檔，解說《雜阿含經論會編》的要義。
2. 「內觀教材研習」共 138 檔，解說佛教心理、內觀經文、禪修問答、佛教邏輯總綱、佛教史總綱、佛法複習等等。

◎內觀教育基金會網站和臉書

基金會網站 <http://www.insights.org.tw/>

臉書：搜尋「內觀教育禪林」、「林崇安」。

佛法教材系列 W7

書名：《六祖法寶記與壇經契嵩本》

編校：林崇安教授

出版：桃園市內觀教育基金會

網址：<http://www.insights.org.tw>

倡印：內觀教育禪林

通訊：桃園市大溪區頭寮路 355 號之 5（內觀教育禪林）

出版日期：2021 年 3 月

歡迎倡印，免費結緣